

FARSA

OJIA E' NA BRUTTA GIORNATA

E' la descrizione di vita quotidiana di una famiglia patriarcale dove la Mamma (Maddalena) vive la sua vita cercando di imporsi sia sulla sua mamma ammalata (Donna Maria), sia col marito (Pietro Giovanni) sia con i suoi due figli (Domenico e Francesco). Si organizza la giornata vivendo le sue cose con apprensione, pensando di controllare tutto e di riuscire a badare ad ogni cosa. Un evento però la mette in seria difficoltà perché, dopo il rientro del figlio, che lavorava a Milano, non riesce a sopportare la sua nuova fidanzata (Concetta), ragazza vivace del paese, perché troppo spigliata e troppo evoluta per i suoi gusti e le sue convinzioni.

Domenico lavora troppo, tanto che la sera, non sempre riesce a fare visita alla sua ragazza che, si sente per questo, trascurata.

Concetta ha bisogno di sentirsi amata, ha bisogno di un diversivo ed in questo, a stimolare la fantasia della probabile suocera (Maddalena), subentrano le voci delle amiche (Fiorella e Silvana) che hanno la scaltrezza di carpire notizie intime su Concetta tramite il fratello di Silvana (Raffaele), ma che suscitano curiosità, timore e apprensione nella mamma di Domenico.

Tra il vero e l'immane costruito, Concetta si ritrova a vivere una doppia vita e si divide tra Domenico (che la trascura) e Vito (focoso amante). Da uno sguardo in chiesa e da un simil racconto del fratello di Silvana (Raffaele) vengono fuori fatti vissuti, ma non interamente verificabili, accaduti tra Vito e Concetta che, a loro dire, si incontravano al buio. Il tutto condito da maliziose affermazioni, da certezze di identità affermate da Rocco, da verità palesate in faccia a chi, volontariamente, trasforma la sua immagine per paura della propria madre.

Tra un pettegolezzo ed un altro, Domenico ritorna ad essere un ragazzo timoroso ed innamorato che, alla fine si sposa con Carmelina, benvoluta anche da sua madre, liberando definitivamente Concetta da ogni vincolo e da ogni pregiudizio.

Anche Vito si convince a modificare il suo stato di amante in fidanzato ufficiale e poi marito di Concetta, mentre il pettegolezzo rimane imperterrito nel salotto di casa di Fiorella che, con Silvana, bellezza mai apprezzata, continua a tener banco nella vita di tutti i giorni del paese in cui vivono.

Ojia è na brutta jionata

<p>1) Ojia è na brutta jionata. dissa a nanna na matina quandu jivi ch'è malata mu nci puortu a medicina.</p>	<p>2) Arrivai nta na trupina pua mi vitta e mi vasau ti portai la medicina ed'allora s'appaciau.</p>
<p>Ca stanotta no' dormivi ca la fhrievi m'ammazzau e chi tantu chi tussivi chi a la fhini mi sfiancau.</p>	<p>Quandu tuttu vaja stuortu e tuttu cada de li mani la jionata è de scumpuortu giusta fhatta pe' li cani.</p>
<p>Fhacia friddu e tira vientu e lu luci è astutatu esta tuttu nu turmientu para tuttu abbandunatu.</p>	<p>Pruovu mo' cu nu cartuni stu carvuni pemmu appicciu mu mi scarfu li purmuni e mu mi cacciu de stu mpicciu.</p>
<p>Si si mpoca chjianu chjianu stu carvuni de livara si fhà lestu a s'uraganu e ni potimu pua scarfara.</p>	<p>Io no' puozzu stara fhora ca stu vientu porta mali ca mi pigghia na malora e mi manda a lu spitali.</p>
<p>Ha mu stajiu riserbata intra, oppuru nta lu liettu ca ancora su malata e ha mu pigghiu nu riciettu.</p>	<p>10) Eccu ccà stu bellu luci chjinu e vrasci è stu vraschieri mo mi pigghiu chista cruci sta pastiglia nto bicchieri.</p>
<p>Mu mi passa chista tussi chista fhrievi chi va e vena stara fherma sunu lussi e pe' chistu stajiu mpena.</p>	<p>Dissa mamma ca pua vena mu s'adduna cuomu stai s'hai mu stai nquarantena o si a lu miedicu ha mu vai.</p>
<p>Mo' chi nc'esta sta calura e a lu liettu su sdrajiata mi passau chiggha sudura e mi sientu rinfrancata.</p>	<p>Quandu vai tu nci lu dici ca la nanna stà già bona ca no' servanu cchjiù miedici e ca mi sientu na matrona.</p>
<p>Statti ccà, no' ti nda jira ca lu luci è ormai appicciatu no' mi fhara mbestialira e no' stara accappuciatu.</p>	<p>Ca la rota è signorili e tu li cavuzzi li puorti no' ti fhanu li fhucili e li gambi no' l'hai stuorti.</p>

<p>Pe' li fhimmini esta vili lu caluri do' vrasceri ca si hanu li fhucili no' li vuonu pe' mugghjieri.</p>	<p>La gunnegghia no', no basta mu cumbogghia tutti l'anchi ca lu luci li devasta e si formanu l'agranchi.</p>
<p>Standu mpiedi na giornata nta faccendi mpaccendata e s'è fridda la vernata sì, nci vo na vrascerata.</p>	<p>20) S'approffitti senza norma e stai cu l'anchi a sti caluri certu sì ca si nda fforma de fhucili e smagliaturi.</p>
<p>Quantu fhimmini distratti no' nci badanu a sta cosa cu li gambi cuntraffatti su na cosa spaventosa.</p>	<p>E si lagnanu ca nuggu nci rivorgianu paruoli no lu sanu ch'è u dinuogghjiu chi li fhanu civettuoli.</p>
<p>Si la fhimmina esta bella s'ha nu bellu portamentu s'hava aspettu de modella è pe' l'uomu sbenimentu.</p>	<p>E la cerca e la rimira s'esta fherma o è chi camina s'innamura pe' piacira e diventa na regina.</p>
<p>Puru tu caru niputi s'hai mu truovi na fhigghjiola guarda bonu l'attributi e si è caminandola.</p>	<p>Si a dominica a la missa vajia spessu e volentieri e si quandu si cumpessa nci bastaru li preghjieri.</p>
<p>Ca si cerca acqua-santieri perda tiempu e cerca scusi sunu ndizi veritieri non'è fhimmina mu spusì.</p>	<p>Ca la fhimmina ha mu sapa mu esta onesta e cuntegnusa ed'è certu ca l'acchiappa l'uomu bellu mu la spusa.</p>
<p>Panni e dota preparati tanti para de linzola li tuvaghji ricamati e nu minimu de scola.</p>	<p>30) Cu dui para de cucina li linzola profumati matarazza de regina stritti stritti e . . . nnammurati.</p>
<p>Piedistagghi e bardacchinu chjinu e sbruocci nu saccuni n'atru supu mu è de crinu e pua lana e piecura e muntuni.</p>	<p>Mu stai cavuddu a lu viernu bellu fhriscu nta l'estati primavera e patratieru a d'ogni tiempu nnammurati.</p>

Chi nci cunti a stu ffigghjuolu de linzola e nnammurati no' lu vidi ch'esta ciuolu e cu li cavuzzi cacati?	E tu chi fai scumboghjiata assettata nta lu liettu de stu modu snaturata chi no' pigghji mai riciettu?
No' ti riendi ancora cunti ca vorissi mu ti lievi no' mi fhara chist' affruntu ca su certa c'hai la fhrievi.	Si ti tuoccu io la fhrunti si la fhrievi ti misuru a quaranta su li punti statti certa ca è sicuro.
Ca' ti fhici nu bullitu cu stu gagghu chi portai mu ti cacciu l'appiritu ca stanotta lu spinnai.	No' guggghjivi tuttu quantu e ti stipai li ali e cuosci ti li mientu cca de cantu ti li mangi s'hai li ngusci.
No' mi dara cchjiù ffastiddu e pemmu pierdu la pacienza propi oja cu stu fhriddu ca t'augmenta la mpruenza.	40) Ca no' puozzu sempe stara cca cu tia a pierdi tiempu ca marituma ha de fhara ca nc'è fhora malutiempu.
Lu dassai nta la cucina ca io tuornu lestu lestu vaju e vijju repentina s'esta izzata o s'esta nsestu.	Ca s'havia già ritornatu chistu ffigghjiu chi mandai cuomu havia raccomandatu no' facia chistu via vai.
Mu mi porta la notizia e mu mi dica cuomu stai cca non'era n'avventizia ca fhujiendu m'ammazzai.	Statti bella arricettata nta lu liettu riposata si no' bua disturbata e chiggha fhrievi disgrazziata.
Ca la testa no' l'hai bona. Mo' ti mangi sta pietanza e no' fara la testona sinno' chjiamu l'ambulanza.	Ti sistemu la cucina pua t'accuonzu nta lu liettu c'ha si già na novantina e ca marituma m'aspetta.
Stu cotraru già ricrama c'ha mu mangia puru igghu ca a chist'ura nci fha fami e ca nci fhici lu conigghju.	Pomeriggiu ti lu mandu accussina sta cu ttia ca sinnò tu fhai nu vandu ca non'hai na cumpagnia.

<p>Era ura pemmu tuorni mu cucini ncuna cosa nomu senti sti latuorni ch'è na cosa scandalosa.</p>	<p>50) Già lu sucu è bellu e prontu l'acqua stacia già gughgiendu tiempu sulu pemmu approntu e si fhina stu turmientu.</p>
<p>Ca nemmenu nui mangiammi e no' sulu hai tu ffastiddu ca stu ffigghjiu è nta li drammi ch'è affamatu e muortu e fhriddu.</p>	<p>Rigatoni nu paninu quattu ova cu sozzizzu dui bicchieri de stu vinu e ti torna lu juidizzu.</p>
<p>Tu ti curchi e io mi spicciu mu sistemu la cucina ggha la nonna torna cicciu e io mu vaju ggha vicina.</p>	<p>Ca tornandu mi chjiamau doppu mangi vieni ccàna e Fiorella m'accennau ca parramu cu Silvana.</p>
<p>No' lu sacciu s'è n'affrontu o si trovau lu nnammuratu o mi fha lu resuontu de chi vitta a lu mercatu.</p>	<p>Puru tu chi nci vai arriedi e chi nci duni tanta corda chista è na liccapiedi doppu mangia già si scorda.</p>
<p>E si pua è na cosa seria? s'è na cosa de fhamigghjia? si no' vaju è cattiveria e cu tia pua si la pigghjia.</p>	<p>S'è pe' mia su scunchjiuduti sistemata la cucina va tranquilla e mi saluti stu giojiellu de vicina.</p>
<p>Ma no' fara nfretta e furia mu sistemi cca sti cuosi ca non'esta na goduria ed'è miegghjiu u ti ripuosi.</p>	<p>60) Mo' chi sacciu ca l'anziana è a lu liettu e si riposa vaju e truovu la Silvana mu mi cunta ncuna cosa.</p>
<p>Curri, vola, fha cchjiù lestu ca u cahhè già si rifhridda e si a notizia è nu pretestu fhatti fhara a camumiggha.</p>	<p>Io no' sacciu chi ha de dira e si a notizia mi riguarda s'esta sulu pe' sputtira o è traditura e na bugiarda.</p>
<p>A lu modu chi chjiamau e a la fhretta chi mi misa no' vorìa mu la sgamau e mu riestu pua arrimisa.</p>	<p>Stu penzieru mi turmenta no' mi dassa cchjiù tranquilla haju fhretta ed'esta urgenta ca mi pigghjia la cazzilla.</p>

<p>Trasa dintra Trasa lestu pigghia postu a stu divanu ca lu fhattu è dionestu e chi tutti ha mu lu sanu.</p>	<p>La dominica a la missa no' nci fhici tantu casu pua fhu suorma chi mi dissa guarda a Vitu a chigghu rasu.</p>
<p>No' dassau pe' nu minutu pemu guarda a Cuncettina doppu tuttu l'accadutu era propi na cretina.</p>	<p>Chi pe' figghjutta no' facia ch'è na sarda menza morta mbeci sai cuomu stacia e com'era tutta assorta.</p>
<p>Sutta sutta e cittu cittu si trovaru a la nesciuta si mbicina tuttu affrittu iggha era compiaciuta.</p>	<p>70) Nci parrava cittu cittu cu lu sguardo tuttu attentu e cu l'uocchji e senza scrittu si dunaru appuntamentu.</p>
<p>Nci dicia:Tantu Micu torna tardu forse mancu ggha mia vena quando torna lu bastardu s'addormenta doppu cena.</p>	<p>Quando è scuru sai chi fai sutta l'arcu ni vidimu ca io arrivu cuomu sai e gghassutta ni vasamu.</p>
<p>Nugghu ntisa chistu dira ma nci fhù na parrasia mu li fhacia ngelusira cu l'amici si tradia.</p>	<p>Dissa: amici, io stasira no' vi fhazzu cumpagnia ca no' puozzu resistira c'ha mu fhazzu na paccia.</p>
<p>Chista mo' è na cosa nova n'agghjuttimu sta cumpetta? dici c'hai mu fhai na prova e ca ti vidi cu Cuncetta.</p>	<p>Statti cittu, no' gridara ca ogni ricchji po' sentira e si ncunu vo' ndagara puru a Micu po' abbertira.</p>
<p>Tantu chigghu è chi lavora e pua a tia chi ti nda mporta no' si tu na fhjiuffhjalora ma esta iggha ch'è na storta.</p>	<p>De na parti mi dispacia ma de n'attra no' mi prema lu problema è ca stacia cu st'amicu e stannu assema.</p>
<p>Mi lu dicia ogni bota quando simu nta lu mieghhjiu chista è na mastravota e ca Micu esta cchjiù bieghu</p>	<p>80) Già lavora, è sistematu mancu fhuma e non'ha vizzi puru ch'è dionuratu esta chjinu de bellizzi.</p>

<p>Stu discuru mi lu fhicia ccà, lu fhrata de Silvana chi frequenta st'amicizia tutti fighghi de puttana.</p>	<p>Nci lu dissi a micarieghu mu la dassa sta cretina ca no' sa' sta cuccuvegha tuttu chigghu chi cumbina.</p>
<p>Ma no' sai la mieghgiu cosa e chi successa ieri sira è na cosa scandalosa c'havarìa de custodira.</p>	<p>Ma siccome si n'amica e na perzuna chi è de chjiesa ti lu dicu cu fhatica senza duolu e senza offesa.</p>
<p>Sutta l'arcu de Vivacqua era ggha chi si vasava lu cunferma mastro Ruoccu ca li vitta ca passava.</p>	<p>Pe' virgogna fhu desiu mu s'ammuccia nta na porta mastro Ruoccu i canuscìu ed'è sicuru cuomu a morta.</p>
<p>Micu parta la matina e rientra a tarda sira ca sinnò sta liccundina l'havia puru de sentira.</p>	<p>Si su io chi nci lu cuntù non'è veru e no' nci crida ma si pigghjiu ncunu spuntu fhorse ntiempu si ravvida.</p>
<p>Io stasira nci lu dicu nta la ricchiu cittu cittu vijju propi si stu Micu si si ncazza o si sta cittu.</p>	<p>90) Ca si certu no' nci crida ti lu puortu pua cca ttia ha mu senta a chista guida e tutta chista porcherìa.</p>
<p>Pemmu sapa puru igghu chi perzuna esta chista mu la pisa a stu spinzigghu ch'è na bona opportunista.</p>	<p>Ca si chista è la presenza e lu vasu esta accertatu certamenta è n'indecenza cu tant'attri sà curcatu.</p>
<p>A Madonna de la Grazzia mu nci fhazzu la ntotata pemmu ciercu chista grazzia e nommu sugnu jastimata.</p>	<p>Mu la dassa chista strata mu si scorda e sta cagnola mu nda trova una posata de fhamigghjia e de fighghjiola.</p>
<p>Mona è ura u mi ricuogghjiu e pemmu tuornu a casa mià mu mi pigghjiu a ciccariiegghu ca ggha nannisa stacia.</p>	<p>Ha mu passu de ggha mamma si la fhrievi nci passau mu cucinu nta stu dramma si Dominicu tornau.</p>

<p>Ca stasira nda sentimu de gridati e de taluorni mu nci cuntù e mu jiasimu tutti chisti chi su scuorni.</p>	<p>C'ha mu dassa sta signura chista fhimmina sgrazziata chi no' porta na russura e chi vorìa na schjiaffijata.</p>
<p>Ojia fhu na brutta giornata, dissi: e Micu mi sentiu ma pecchè sta sbumbulata dimmi: chi ti succediù?</p>	<p>100) Nta sta vita no' sai mai qu'è a perzuna chi frequenti tanti vuoti no' lu sai si su luordi e dilinquenti.</p>
<p>Su notizi chi lejisti o ti riferisci a ncinu? mi riguarda o 'mpaccisti o mu sientu è opportunu?</p>	<p>Ha mu senti sta merchetta propi a tia è chi ti riguarda mi cuntaru ca Cuncetta non'è sulu menza sarda.</p>
<p>Chi bua dira ca è na cana e non'è bella e nzucarusa? pierzi già la tramuntana ma esta ancora dubitusa.</p>	<p>Non'è sulu vanitusa ch'esta puru maistruna sembra puru ch'è gelusa e fhacia ngiru la matruna.</p>
<p>Era mbrazza a nu nimicu sutta l'arcu chi vasava Vitu sì, lu caru amicu e chi tutta si scialava.</p>	<p>Beggha fhimmina trovasti fhatta si de boncostumi si nci tuocchi certi tasti ti diventa putridumi.</p>
<p>Non'è veru certamenta iggha penza sulu a mia nci lu dicu s'è scuntenta s'esta veru o fhisserìa.</p>	<p>Mo' mi lavu e cu malizzia mu la ncuntru vajiu sulu e si è vera sta notizia l'acchjiappu a cavucci nto culu.</p>
<p>Chistu tu no' l'hai de fhara ca si n'uomu chi ragiona ha mu dassi chista strata e ti nda truovi n'attra bona.</p>	<p>110) Cca no' simu a la padania nta Milanu o nta Torinu cca la fhimmina chi smania non'è pe' nu paladinu.</p>
<p>Prima fha la fhanciscana pua de corpu nci cumbena fhà de cchjiù la jioculana e tu ambeci nci vua bona.</p>	<p>Io la dassu ti lu giuru s'esta veru chistu fhara si si ncuntra nta lu scuru m'hajiu puru d'accertara.</p>

<p>Ti lu giuru ch'è nu smaccu cca nginuocchjiu ti lu dicu Vitu esta nu vigliaccu e non'è nu veru amicu.</p>	<p>La Madonna mu ti sente lu Signuri mu t'ajuta liberatti e sta pezzente de sta fhimmina vinduta.</p>
<p>Sira stessa Cuncettina si ncuntrau cu micariegghu cu la fhacci malandrina ggha successa nu ribiegghu.</p>	<p>Io no' su materialista e nta la testa hajiu a tia ma nu vasu a la sprovvista è pe' tia vigliaccheria?</p>
<p>Tu no' pienzi ca pe mia chi de jiuornu riestu sula puozzu avira nostalgia e nu vasu mu hajiu ngula?</p>	<p>Tu la sira tuorni tardu certi vuoti mancu vieni ne' nu vasu ne' nu sguardo e pua fhai sti cantilieni?</p>
<p>Ca nta chistu parapigghia puocu cuosi sunu buoni la fhatiga, la fhamigghia e nu bonu matrimuoni.</p>	<p>120) Ca na fhimmina cu n'uomu puru quandu sunu zziti non'è cuomu maggiardomu stannu cuomu calamiti.</p>
<p>Ca nu vasu e na carizza e nu capigghu fhora postu la vita ti s'arrizza e ti fha perdera la testa.</p>	<p>Propi tu mi fhai sti stori tu chi sini comunista propi tu senza pudori mo' mi fhai lu moralista.</p>
<p>Ti fhacivi l'evolutu frequentavi chista e chiggha tu non'ieri nu cornutu pugalavi a la cudiggha.</p>	<p>E si ncunu all'improvvisi ti cercava pe' na cosa si sapia nta lu paisi ch'era io la permalosa.</p>
<p>Quandu Vitu a lu mignanu mi dicia ca ad'ogni agustu Micu resta nta Milanu pemmu fha lu bellimbustu.</p>	<p>Era certu, havia ragiuni io non'era mburritusa ieri tu lu cornutuni e no' io la dispettusa.</p>
<p>Ti fhacisti n'esperienza de sta vita assai mundana t'abbuttasti a schjiattapanza e mo' su io la jioculana.</p>	<p>Cca ti fhai lu riservatu ca de mammata ti spagni doppu t'hava cunzigghjiatu e ti ha scegghjiutu li cumpagni.</p>

Chista è bona, è na schifhezza chista esta senza scola quandu vo' mu ti disprezza dicia ch'èsta na cagnola.	130) Si la fhai scumpariscira t'arma sempre na gazzarra si non'hava attru de dira dicia ca tu si tamarra.
Dimmi, mo' chi simu suli, cuomu mai quandu mi tuocchi e t'hai cacciatu li tua guli sini tu chi pua t'arruocchi?	Sini tu chi fhai cornici quantu bena chi ti vuogghju dassa stara l'attri amici stai cu mia ca no' ti mbruogghju.
Certu io su sempre ccana tu lavori, tu si bonu sugnu io chiggha pagana e chi criu stu fhrastuonu.	Mona dimmi: qu'è st'arditu sutta l'arcu quandu passu chi mi vitta assieme a Vitu mu mi cacciu ncunu spassu?
Certamenta fhu Silvana o lu fhrata, bell'imbustu chigghu fhigghju de puttana si lu guardi è nu disgustu.	È la mbidia chi la spingia a chiggha brutta nzalinuta non'ha culu ed'è na gringia ed'è na fhimmina varvuta.
Mo' mi sientu cchiù leggera e no' ti ciercu nu cunzienu ca no' su na ventulera mona sai cuomu la pienu.	Certu mammata è cuntenta ca resciu mu mi fha fhora ca lu sacciu ch'è scuntenta e ch'era io lu crepacora.
Vavattinda e no' tornara ca mammina è chi t'aspetta trovatila na cotrara ca no fai pe' sta Cuncetta.	140) Micu ntisa nta li fhjianchi ca havia sbagghjiatu tuttu cu la cuda ammienu l'anchi si nda jiu ch'era distruttu.
La notizia e sta' rottura girau tuttu lu paisi tiempu già nu quartu d'ura tutti eranu arrimisi.	Nta lu Bar e nta la chiazza era tuttu nu commentu ca Cuncetta era paccia ca ruppju u fhidanzamentu.
Nc'era puru attra genta chi nci dava curpa a Micu si la fhimmina è scuntenta lu vidia cuomu nimicu.	Era tantu lu scalpori chi lu prieviti a la missa no ' parrau do' redentori ma e Cuncetta crucifhissa.

<p>No' bastava la Fiorella e la postina de Silvana ca de chista scappatella si parrava a tutta spiana.</p>	<p>Ed'ognunu scommettìa ca domana micu torna soprattuttu ntrattoria si parrava de sti corna.</p>
<p>Si parrava de la fhama chi havia micu nta Milanu soprattuttu genta mpama dicià ca era nu mammanu.</p>	<p>Penza sulu a lu lavoru mai nu svagu o na nesciuta mo' nci tena a lu decoru ca la mamma è mbestialuta.</p>
<p>Tutti chisti signorini hanu armenu na speranza soprattuttu i chjiù carini chi nci dunanu mportanza.</p>	<p>150) Cchiù de tutti la Silvana ncumpidenza cu la mamma no' fù mai na grande dama ma havia ntesta stu programma.</p>
<p>Doppu tiempu a li torturi Micu cchjiù no' nci penzava si scordau de chigghu amuri e cu n'attra si ncontrava.</p>	<p>Cu la mamma prediletta micu guarda sempre ntuornu nc'era Vitu cu Cuncetta si fhiniu chigghu taluornu.</p>
<p>Pua na bella signorina chi guardava 'ndirezioni vitta a Micu cu mammina e nci arrivau l'ispirazioni.</p>	<p>Quando micu l'annocchjau la guardau cu cchjiù nsistenza l'uomu pua si nnamurau e trasiru ncumpidenza.</p>
<p>Na parola rivorgiù e la cotrara accusentia Jiendu avanti s'accorgiu Ch'era chigghu chi volia.</p>	<p>Io lavoru, e sugnu Micu e tu, mia cara signorina sacciu c'hai nu nomi anticu tu ti chjiami Carmelina.</p>
<p>Sugnu io, su Carmelina sugnu nova e stu paisi ca nescivi all'Argentina mentre mamma è Calabrisi.</p>	<p>Sugnu ccà de quasi n'annu e no' sugnu n'eroina ntisi dira de n'ingannu de nu Vitu e na Cettina.</p>
<p>De na mamma ch'è gelusa de nu fighghiu tantu bieghu ch'esta tantu premurusa pe' stu fighghiu pacciariegghu.</p>	<p>160) Ca Cuncetta nta nu postu cu nu Vitu si ncontrava cittu cittu e de nascostu l'abbrazzava e la vasava.</p>

<p>Sacciu puru ch'esta bella sta Cuncetta spudorata ca fhu pe' na scappatella chi fù puru abbandunata.</p>	<p>Menu mala ca sai tuttu e ca nci fhu na sburijata ca sinnò sembrava bruttu sai ch'è storia già passata.</p>
<p>Esta veru ca era io all'iniziu ch'insistia sutta l'uocchji de stu Dio fhicia na vigliaccherà.</p>	<p>Mi dicìa ca mi volìa ch'era io l'amuri havutu mentre mbeci mi tradìa e mi fhicia nu cornutu.</p>
<p>Io no' fhici na scenata ne' tampocu nci minai era sulu disgrazziata ed'allora la dassai.</p>	<p>Io nda vitti de sti tizi e de sti fhimmini a Milano tutti chjini de malizi de cumportamentu stranu.</p>
<p>Io de ggħa' mi nda volài pecchè nughu mi piacià quandu pua m'innammurai fhu na randa fhisserìa.</p>	<p>No' rescia mu mi scatturu ca cu mià volianu stara li cangiava de sicuru ca m'havia de tutelara.</p>
<p>Ca su bellu su sicuru e ca pe' chistu su cercatu de la fhimmina 'nfuturu ha mu sugnu nnammuratu.</p>	<p>170) Sugnu onestu e su sinceru io de' tia su nnammuratu si mi cridi ch'esta veru ca fhui sempe denigratu.</p>
<p>La risposta ti la dugnu la dominica a la missa c'hai mu vidi cuomu sugnu e ca no' sini na scummissa.</p>	<p>Tu mi piaci, e su sicura ca pe' mia sì chigghu giustu io no' sugnu na signura ma cu tia nci pigghju gustu.</p>
<p>Ti guardava l'attru jiuornu ch'ieri assieme a na signora era quasi menzijuornu mi trasisti nta lu cora.</p>	<p>Nta la chjiesa ti guardava osservava li tua ricci mamma dissa fha la brava no' criara attri pasticci.</p>
<p>Guarda ch'è nu dongiovanni u fhidanzatu de Cuncetta si dassaru de dui anni chissu dicìa la gazzetta.</p>	<p>La Fiorella cu Silvana lingui luonghi canusciuti nci criaru chiggha grana chi nesciru stravortuti.</p>

<p>L'importanti è mu fhiniù chiggha storia ngarbugliata nta lu cora mi trasiù e già sugnu nnammurata.</p>	<p>Si ti l'hai de conquistara no' guardara la bellizza no' lu fhara mai dannara mu nci fhai ncuna carizza.</p>
<p>La fhortuna mu ti aiuta e la Madonnamu mu t'accoghghia pemmu sini compiaciuta e mu fhormati na fhamigghia</p>	<p>180) lu matinu nci lu dicu a la nesciuta de la missa ca lu vuoghghiu a chistu micu e ca su io la barunissa.</p>
<p>Pua nci dicu pemmu vena cu la mamma a casa mia pemmu staiu cchjiù serena e mu nci dicu "vita mia".</p>	<p>Ca papà ha mu canuscia ha mu mi duna nu giudiziu nommu pigghia ncuna nguscia e nommu caiu mprecipiziu.</p>
<p>Si nci piacia si è cumbintu si nci para ca è pe' mia si lu vida ch'è distintu e si nci fhacia simpatìa.</p>	<p>Mo' chi Pasqua si mbicina già lu mbitu a casa mia accussina Cuncettina si rassegnà e accussi sia.</p>
<p>Quandu simu fhidanzati pua restara cchiù cu mia ca già simu nnammurati e si tu la vita mia.</p>	<p>Tu lu jiuorni vai e lavori io t'aspiettu e scrupolosa li rispettu li decori comu fhussi la tua sposa.</p>
<p>Quandu tuorni sì cca mia io t'aspiettu a vrazza apierti ca io sempre ti vorìa puru sutta li cuvierti.</p>	<p>Nui già simu nsintonia Su daccordu i genitori tu chi si l'anima mia simu assieme dui tesori.</p>
<p>E lu tiempu maturava Jiuorni e jiuorni ncumpagnia era certu ca' spusava e ogni jiuornu prumentia.</p>	<p>190) Cu la mamma jia d'accordu cu lu suoceru brindava cu a cotrara era n'ingordu era certu ca l'amava.</p>
<p>E li siri a rientrata da fhatiga o do' lavoru prima jia ggha fhidanzata ca trovava lu ristoru.</p>	<p>No' a dassava nu minutu era sempe ncumpidenza ca la testa havia partutu nci bastau chiggha esperienza.</p>

Era sempe cchjiù cuntientu tantu è veru chi cangiau s'accattau l'appartamentu la pigghjua e si la spusau.	Tiempu appena nova misi nu cotraru nci nesciu tutti eranu arrimisi ca l'amuri risorgiu.
E la nonna e u vicinatu tutti quanti li matini a lu picciulu nionatu lu inchjenu de mboini.	De rigali de vasati de gioielli e catenini e li nonni abbarroccati chi nci offrianu biccherini.
Riccu e santu stu cotraru Sanu e sempe rispettusiu Pemmu criscia milionaru E nomu esta annaccarusu.	De lu patra mu nda pigghjia e de la mamma la bellezza mu è nu fighghju de fhamigghjia mu è distintu pe' destrezza.
Nu niputi è nu gran donu De stu Dio e d'è na prova pe' nu nonnu tantu bonu chi l'aspetta e si rinnova.	200) Ojia è na bella jionata; doppu chigghu chi passammi dissa mamma assennata "si fhiniru chigghi drammi".

PERSONAGGI:

- | | |
|--------------------------------|----------------------------|
| 1) Nonna | Donna MARIA |
| 2) Figlia di Maria | Donna MADDALENA |
| 3) Marito di Maddalena | Mastro PIETROGIOVANNI |
| 4) Figlio di Maddalena e P.G. | Piccolo FRANCESCO (Cicciu) |
| 5) Figlio di Maddalena e P.G. | Il Bello DOMENICO |
| 6) Amica | Signorina FIORELLA |
| 7) Amica dell'amica | Signorina SILVANA |
| 8) Fratello di Silvana | RAFFAELE |
| 9) Prima fidanzata di Domenico | CONCETTA |
| 10) Amante di Concetta | VITO |
| 11) Altri amici | RAFFAELE, VINCENZO, FRANCO |
| 12) Attento riconoscitore | Mastro ROCCO |
| 13) Nuova Fidanzata/Moglie | Signorina CARMELINA |